



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Dili
24 Jullu 2014

Akuzasaun ministériu públiku la koresponde ho sofrimentu vítima

Iha 18 Jullu 2014, Tribunál Distritál Dili julga arguidu AA ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 11 Outobru 2012, arguidu basa lezada nia hasan, tuku dala barak iha isin lolon no tebe iha hirus matan. Iha 24 Outobru 2012, arguidu lori katana ta'a lezada nia liman nune'e rezulta kanek no ran iha lezada nia liman. Motivu husi kazu ne'e tanba arguidu deskonfia lezada ba mane seluk.

“Hanesan autóridade judisial ne'ebé iha lejitimadade legál hodi reprezenta vítima, ministériu públiku tenke asegura investigasaun ne'ebé klean no apropriadu atu promove akuzasaun ne'ebé reflète faktus ne'ebé akontese no konsekuensia ne'ebé lezada sofre,” dehan Diretor Ezekutivu JSMP, Luis de Oliveira Sampaio.

JSMP observa katak ministériu públiku falla akuza ho artigu apropriadu, tanbá agresaun ne'e prienxe elementu krime maus tratus ba kónjuje iha artigu 154 Kódigu Penál.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 3 no 35 Lei Kontra Violénsia Doméstika.

Depoizde produsaun de prova, tribunál halo avaliasaun ba faktus ne'ebé produs iha julgamentu, hodi fo prazu ba ministériu públiku no defeza atu fo pozisaun prosesual tuir artigu 274, maibé parte rua presindi prazu ho nune'e tribunál kontinua ba alegasaun.

Iha audiénsia julgamentu ne'e, arguidu la marka prezensa tanba aktualmente arguidu hela iha Irlandia tanba depoizde akontesimentu ne'e, arguidu aranka kedas ba Irlandia.

Iha lezada nia depoimentu, reforsa katak arguidu komete krime ne'e tuir faktus ne'ebé konsta iha akuzasaun.

“JSMP hanoin katak importante ba ministériu públiku iha futuru atu konsidera aplika medida koasaun ba kazu hot-hotu ne'ebé iha nivel investigasaun, atu nune'e, bele garante katak arguidu bele hela hakmatek iha fatin, durante prosesu seidak konklui” dehan Diretor Ezekutivu JSMP, Luis de Oliveira Sampaio.

Iha alegasaun ministériu públiku konsidera faktus hotu-hotu provadu tuir konfisaun arguidu nia iha inkeritu ministériu públiku no konfirmasaun lezada iha tribunál. Relasaun ho faktus ne'e, ministériu públiku husu ba tribunál atu aplika pena adekuaudu ba arguidu. Alegasaun defeza husu ba tribunál atu aplika pena ne'ebé apropiadu.

Tribunál konsidera faktus hotu-hotu provadu tuir akuzasaun no konfirmasaun lezada nune'e konklui kondena arguidu ba krime primeiru ho pena prizaun fulan 9 no ba krime segundu ho pena prizaun fulan 6. Kumulasaun ba krime rua ne'e tribunál aplika pena únika tinan 1 no suspende ba tinan 3. Sentensa ne'e kman teb-tebes wainhira kompara ho lezada ninia kanek. Se arguidu ne'e akuza ho Artigu 154 Kódigu Penál, nia sei simu sentensa ne'ebé apropiadu liu entre tinan 2 too tinan 6 iha prizaun.

Kazu ne'e rejista iha tribunál ho Nú. Prosesu: 35/2013/TDDIL, ne'ebé prejide husi Dr. Julio Gantes. Ministériu Públiku representa husi Dr. Jacinto Babo no arguidu hetan defeza husi Dr. Sergio Paulo Dias Quintas husi Defensória Públiku.

Atu hetan informasaun kle'an favor kontaktu direitamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883|77295795 Website: www.jsmp.tl

Facebook: www.facebook.com/timorleste.jsmp

Twitter: @JSMPTl